

Hamed Sućeska, geod. inž.



Dana 24.06.2020. godine iznenada nas je napustio cijenjeni kolega Hamed Sućeska.

Hamed Sućeska je rođen 10.01.1951. godine u Višegradu. Osnovnu školu i gimnaziju završio je u Višegradu, nakon čega dolazi u Sarajevo gdje 1971. godine upisuje Višu geodetsku školu. Školu je upisao sticajem okolnosti, premda je njegova velika ljubav bio Medicinski fakultet. Studij je okončao 1975. godine s najboljim ocjenama i stekao diplomu geodetskog inženjera.

Svoj radni vijek započinje u firmi GP „PUT - niskogradnja“ 1975. godine, na poziciji šefa gradilišta. Za nekoga ko je tek diplomirao, bio je to veliki izazov, koji je uspješno savladao svojim entuzijazmom i željom za radom. Godine 1976. zapošljava se u Geodetskom zavodu Sarajevo, gdje ostaje do početka rata u BiH 1992. godine. Rad u Zavodu je bio pun izazova i terenskog rada. Hamed je stekao jako puno prijatelja, obzirom da je obavljao geodetske poslove na teritoriji cijele Bosne i Hercegovine, a radio je i u drugim republikama nekadašnje Jugoslavije.

Na samom početku rata pristupio je tadašnjoj Armiji Republike BiH, tačnije Zelenim beretkama, odred Širokača, te svoje odijelo zamjenjuje vojničkom opremom. Svojom čvrstinom i hrabrošću nametnuo se kao istinski partiota i veliki borac. U toku rata biva i ranjen, nakon čega je demobilisan. Tokom cijelog perioda rata, na volonterskoj osnovi je predavao stručne predmete u Građevinsko-geodetskoj srednjoj školi u Sarajevu, budući da nije bilo nastavnog kadra. Uvijek je to isticao kao jedno od najdražih radnih i životnih iskustava.

Godine 1993. počinje raditi u Općini Centar Sarajevo, te dugi niz godina provodi u radnom odnosu kao Viši samostalni referent za geodetske poslove i katastar nekretnina. Obavljao je poslove održavanja premjera i katastra nekretnina u skladu sa zakonom, poslove obnavljanja mreže poligonskih tačaka, geodetske poslove za potrebe urbanizma, geodetske poslove u postupcima eksproprijacije, arondacije i druge poslove koje je časno i savjesno obavljao sve do 2015. godine, kada odlazi u penziju.

U toku cijelog svog radnog vijeka razvio se u vrhunskog stručnjaka ali je bio i neumorni humanista, prepoznat po svom strpljenju da znanje prenosi na mlađe kolege.

Penzionerske dane provodio je sretan i zadovoljan, na vikendici i sa unucima, sve do 24.06.2020. godine kada se iznenada završava njegov život u 70-oj godini. Iza njega su ostali supruga, sin i kćerka sa porodicama. Ukopom na sarajevskom groblju Hambina Carina 26.06.2020. godine, pri čemu su se od Hameda oprostili porodica, rodbina prijatelji i kolege.

Njegovom smrću geodetska struka je izgubila vrsnog stručnjaka, a kolege velikog prijatelja i saradnika.

Neka mu je hvala za sve što je učinio.

Amir Mujan